

مسارات الرعب 2

HORROR TRACKS

هيسستيريا الصورة



وسام سعيد

دار دؤن

مكتبة فريق_متميزون.

لتحويل الكتب النادرة الى صيغة نصية

قام بالتحويل لهذا الكتاب:



كلمة مهمة:

هذا العمل هو بمثابة خدمة حصرية للمكفوفين، من منطلق حرص الجميع على تقديم ما أمكن من دعم للإنسان الكفيف، الذي يحتاج أكثر من غيره للدعم الاجتماعي والعلمي والتقني بحيث تعينه خدماتنا هذه على ممارسة حياته باستقلالية وراحة، وتعزز لديه الثقة بالنفس والاندماج بالمجتمع بشكل طبيعي. وبسبب شح الخدمات المتوفرة للمكفوفين حرصنا على توفير خدمات نوعية تساعد الكفيف في المجالات التعليمية العلمية والثقافية وذلك بتسخير ما يتوفر من تقنيات خاصة لتحويل الكتب الي نصوص تكون بين أيديهم بشكل مجاني، ويمكن لبرامج القراءة الخاصة بالمكفوفين قراءتها.

مع تحيات:

فريق متميزون-

انضم إلى الجروب

انضم إلى القناة

مسارات الرعب (٢)

هستيريا الصور

رواية..

وسام سعيد

مسارات الرعب..

لقد ولى زمن الطمأنينة.. وأن تغط مسترسلاً في نوم عميق.. الآن لا وقت.. فقد اندفع هدير صرخات الضحايا.. من البوابة (ن).. فلا راد لشره.. رياحها الساخنة تقترب.. هل شممتها؟ إنها الآن خلفك.

لقد وقع في مرمى حممها الغاضبة ٤ أشخاص اختارهم القدر.. ليجدوا أنفسهم متورطين في قصصها التي لا تنتهي.. إنه فريق (مسارات نون السوداء)، الذي تكون تلقائياً، وليس اختيارياً.. وهم كالتالي:

١ - الدكتور مريد

طبيب نفسي في أواخر الأربعينيات.. يمتلك واحدة من أكبر مستشفيات العلاج النفسي والإدمان في مصر.. يسعى دائماً لاكتشاف كل جديد في مجاله.

٢ - حمزة التاجي

شاب ثلاثيني.. لا يجد روحه إلا بين دفتي كتاب أو أمام «اللابتوب» الخاص به، لا يتوقف عن الإبحار في عالم (الباراسيكولوجي) وعلم النفس الموازي وعلم الخوارق، وقصص الأشباح، وتناسخ الأرواح، والقوى غير المرئية.

٣ - نزار غنيم

كاتب صحفي في مطلع الأربعينيات.. يتمتع بقدرات خاصة في الرياضة الروحية، وتمارين التحكم النفسي والذهني، نتيجة لتصوفه وحبه لآل البيت، ورغبته العميقة في الحياة.. يعشق المرح في أعتى لحظات احتباس الأنفاس.

٤ - فدوى عبد الدايم

صحفية حوادث تبلغ من العمر ٢٦ عاماً.. تمتلك ذكاءً حاداً وشجاعة تليق بطبيعة عملها.. ولكن جمالها وبراعتها الملفتان لم يشفعا لها فيما ستقبل عليه من أهوال جراء دخولها عالم (ن).

لقد غادرنا نحن سكان الأرض منذ أيام عهد السكينة.. وعبرنا دون أن نشعر أولى بوابات الظلام.. والأخطر سيتوالى تباعاً.. من الآن حاول الفرار.. والزم توازنك مهما شاهدت.. مهما انقلبت أمامك الإحداثيات واختلت القوانين.. الزم ثوابتاً عشت عليها وتفهمتها.. لعلك تخرج من قائمة ضحايا تلك المسارات المظلمة.

توقفت السيارة الفارحة أمام إحدى البوابات الإلكترونية الكبيرة لواحدة من أفخم فيلات المعادي في انتظار أن تفتح لها كتيبة الحراسة الأمنية..

ثوان معدودة وانفتح الباب بعد أن أمرهم رجل الأمن، فدفقت السيارة للدخول لتسير في ممر كبير تحيط به الحدائق والزهور من الجانبين، وما إن توقفت أمام مدخل الفيلا الفاخرة، حتى خرج منها أربعيني تبدو عليه علامات الرجل الثري كما يرسمها المخرجون في السينما.. بدانة في الجسم لكنها تليق به وتعطيه مسحة «عز»...

بدلته الفخمة ونظارته الشمسية.. ومسكته للموبايل وعلبة السجائر وميدالية المفاتيح في يد واحدة.. وتاماً كما يفعل ممثلو السينما فور خروجهم من السيارة، وجّه نظره للأعلى في اتجاه القصر وهو ينفث دخان سيجارته في كبرياء واضح..
وبنفس هذه الملامح المتعطرسة كان بالكاد يتحدث مع موظفة الاستقبال، طالباً منها الدخول لمقابلة مدير المصحة مباشرة.

- د. هاني الزيات

- أبوه... تحت أمر حضرتك... ماله؟!!

- هو عنده فكرة إني جاي النهارده

- يعني فيه معاد حضرتك؟!!

يرفع نظارته من على وجهه، فتكشف عن ابتسامة صفراء ثم يقول بلهجة استخفاف:

- هو أنا مش قلت لحضرتك.. إنه عنده فكرة إني جاي؟!!

بغیظ وحنق ترد الموظفة:

- أقول له مين؟

- المهندس شريف أخو رشا الجداوي... كانت نزيلة عندكم هنا بقالها ٣ شهور، والمفروض إنها تخرج النهارده لأنها ما بقتش محتاجة علاج... ده آخر كلام بييني وبين الدكتور هاني... كده كفاية ولا أقول تاني!!

- طب حضرتك متضايق ليه.. أنا بأسأل: أقول له مين علشان أبلغه... عموماً عبال ما أبلغ مكتبه اتفضل حضرتك اطلع الدور الرابع.

∞ ∞ ∞ ∞ ∞

كان الدكتور هاني الزيات الطبيب النفسي المشهور، وصاحب أكبر وأعلى مصحة في القاهرة في توك شديد لرؤية أخو رشا الجداوي صاحبة أعجب مرض أو حالة في تاريخ العلاج النفسي، وأيضاً ليتعرف على الرجل الوحيد المسئول عنها، والذي كان يتابع حالتها بالهاتف فقط خلال إقامته في لندن.

أي أخ هذا الذي يتولى الإنفاق على علاج أخته غيابياً، ويدفع مصروفات المصحة في مواعيدها عن طريق الفيزا، ولم يفكر في زيارتها مرة واحدة خلال ٣ شهور كاملة، ولم يتحدث هاتفياً إلا ٣ مرات.. الأولى حين علم بأن صديقات أخته قاموا بنقلها في حالة «هلع» إلى المصحة، والثانية حين أراد أن يعرف القسط المتبقي من

مصروفات علاجها، والثالثة حين جاءت رسالة على «المانجر» من الدكتور هاني الذي يتولى الإشراف على حالتها بأنها الآن في حالة طيبة تسمح لها بالخروج.

- أهلا بحضرتك يا باشمهندس شريف..

- أهلا يا دكتور

- أنا مكلم حضرتك من أسبوع.. إيه اللي أخرك؟

- أبدأ.. بس مش المفروض إن لما أقرر آجي مصر وأنا في لندن آجي ثاني يوم علطول، أنا ليا شغلي برضه ومواعيدي وترتيباتي اللي لغيتها كلها علشان آجي أشوف إيه حكاية رشا

- مفيش حكاية ولا حاجة... القصة بسيطة بإذن الله..

- بسيطة إزاي.. ده أنا ما صدقنتش لما قرئت رسالة حضرتك إنها بقت كويسة، بعد ما عرفت إنها دخلت المستشفى في حالة سيئة وصاحباتها شايلينها.. إزاي حالة زي دي علاجها يخلص في ٣ شهور؟!!

- ومين قال لحضرتك إن علاجها خالص.. المصحة هنا دورها تتلقى الحالات الصعبة وتوقفها ثاني على رجلها، وترجع لها الرغبة في الحياة والدافع من جديد، وبعدين تيجي مرحلة ثانية من العلاج وهي الأهم، إننا بنتابع حالة المريض بالتعاون مع أهله وبالذات إن فيه أكثر من دواء لازم يتاخدوا في مواعيدهم

فضلاً عن إن حالة رشا وإن كانت دلوقتي مستقرة لكن وارد إن الاكتئاب يهاجمها ثاني، وتحصل انتكاسة، لو حسنت إنها لو حدها أو حصل إهمال في الدواء.

علشان كده بأسألك... حضرتك أكيد ناوي تسافر ثاني لندن.. هل هتاخدها معاك ولا هتعمل إيه؟

- أأ.. الحقيقة لسه مش عارف... لكن أنا لازم أشوفها الأول وأقرر... بس اللي أعرفه عن أختي إنها جامدة.. وتقدر تعدي الأزمة دي... ده طول عمرها فرفوشة وبتحب الضحك والتهريج.. مش رشا خالص اللي تكتئب وتتضايق

- بص يا باشمهندس... المريض عندنا بيبقى في نظر أهله دايمًا مقصر في حق نفسه، وبيبقوا شايفين القصة مجرد اكتئاب.. وطبعًا كلمة الاكتئاب دي أصلًا عامة ومش معبرة فعليًا عن تفاصيل حالة المريض الحقيقية

- طب هي عندها إيه؟

أخذ د. هاني نفسًا عميقًا وهمم بالإجابة، لكن شريف بادره فورًا:

- ااا استنى... استنى يا دكتور... ما تحكيش... أنا أصلًا ما باستحملش الحاجات دي... بس عمومًا مش أنت بتقول إنها بقت كويسة.. خلاص سيبنا م اللي فات... افنكر نشوفها بقى ونظمن عليها علشان نلحق نروح

د. هاني ينظر لشريف بابتسامة تعجب واندھاش من طريقة تفكيره، ويتردد داخله سؤال واحد: انتوا إزاي إخوان؟!!

وبحسب رفع سماعة الهاتف وطلب من الممرضة استدعاء رشا من غرفتها، وما هي إلا دقائق وكانت رشا ممسكة بحقيبة ملابسها وواقفة على باب غرفة الدكتور هاني، وكأنها تمتنع عن الدخول

- ايه يا رشا فيه ايه؟!... أنت حالفة ما تخشي ولا ايه؟!... أنت مش شايفة مين ده؟!...
المهندس شريف أخوكي!!

تخلّى شريف عن تحفظه وتصنعه ونهض واقفًا متحمسًا لرؤية أخته بعد فراق دام ١٠ سنوات، واقترب منها مسرعًا ليعانقها، ولكنها قابلت إقباله ببرود ومدت يدها في رفض واضح لأحضانها الكاذبة قائلة:

- أهلاً يا شريف

تسمر شريف في مكانه واستدار د. هاني بكرسيه للخلف في اتجاه النافذة منعًا لأي حرج قد يستشعرونه.

بنظرة إحراج وغيظ مد شريف يده ليأخذ الحقيبة، ثم لوح للدكتور هاني بيده في إشارة شكر قائلاً:

- شكرًا يا دكتور على مجهودك... وعمومًا خيلنا على تواصل.. شكلنا كده هحتاجك كثير

- أهلاً بيك طبعًا في أي وقت.. وبالنسبة لك يا رشا.. إحنا اتفقنا خلاص على جدول الدواء ومواعيده، والتمارين اللي مش هنبتلها أبدًا.. وتليفوني معاك... كلميني في أي وقت

فيمد يده من بعيد لتصافحه... فتتنظر لحظات ليده في امتعاض.. ثم تقرر أن تدخل الغرفة بخطوات سريعة نسبيًا وتمد يدها وتصافحه سريعًا ثم تتصرف بسرعة وكأنها تهرب من شيء ما داخل الغرفة بل بالقرب من مكتب الدكتور هاني، وبالطبع لم يرغب ذلك عن باله، فجلس على مكتبه متهدًا في عمق وقلق، ثم أمسك ببرواز لصورة كبيرة كانت على حافة مكتبه الأمامية في اتجاه ضيوفه الجلوس أمامه.

كانت الصورة للدكتور مع زوجته وطفلهما الوحيد ولكنها كبيرة الحجم بما يكفي للفت انتباه كل من يجلس أمام المكتب...

فأمسكها الدكتور هاني ونظر إليها وطفق يفكر، وملاحه تقول إن الأيام القادمة تحمل المزيد من المفاجآت على يد هذه الفتاة الثلاثينية.

∞ ∞ ∞ ∞ ∞

في السيارة كانت رشا متوقعة كل محاولات شريف لاسترضائها ومصالحتها، فبدت صامته موجهة نظرًا للنافذة كي لا تعطه فرصة الحديث.

وبالطبع كان شريف ممتلئًا بالحرَج، والشعور الحقيقي الفطري بالشفقة على أخته خاصة وهو يدقق التأمل في خصلات شعرها الأبيض المتناثرة وسط اللون الكستنائي الجميل، ووجهها الشاحب وتلك الهالة السوداء المحيطة بعينيها، وجسمها النحيل

وفي رأسه يدور ألف سؤال:

ما الذي حول فتاة جميلة تخطت عامًا واحدًا بعد إتمام عقدها الثالث إلى هذا الحطام؟!!

أين ذهبت روحها المرححة وحبها للضحك والسهر والأصدقاء؟... حين كانت «دلوعة» العائلة وقت أن كانت صغيرة.

وحتى بعد وفاة والديها ظلت «رشا» ترفل في حلل الدلال.. وتتصرف بحرية مطلقة أثار حفيظة جدتها... فمن أين جاءت هذه الأزمة النفسية؟!

هذه التساؤلات تعد منطقية، حينما تصدر من رجل مثل شريف الجداوي.. عاش وحيد والديه، عمرًا طويلاً حتى بلغ الثامنة عشرة، ورغم استمتاعه برفاهية الأثرياء، إلا أنه عانى من قسوة والده وعدم اهتمامه به، وتجاهل أمه أيضاً، حتى جاءت أخته في سن متأخرة لوالديه، ومن فرط فرحتهما بها جعلوها محور حياتهما، وحظيت بالنصيب الكامل من الاهتمام، على حساب أخيها الكبير.

لذلك كان قراره بأن يستقل ويفصل عنهما ويحصل على نصيبه كاملاً من ثروة والده في حياته، ثم قراره السفر إلى لندن وزواجه من بريطانية، له أكبر الأثر في حالة الفتور والجفاء التي تفرض نفسها الآن بينه وبين أخته حين التقيا بعد ١٠ سنوات في موقف يقتضى أن يستند أحدهما على الآخر.

لم يكن الأب والأم مثاليين، أو نموذجًا تشعر معه بالشفقة لما فعله بهم شريف حين تركهم وطالبهم بنصيبه من الثروة، بل كان البيت دائماً مناخاً لا يصلح لتربية أطفال أسوياء، وبالأخص حين تطورت تلك المعركة الدفينة بين الأم وحمايتها والتي كانت باستمرار تلوم ابنها على إهماله لولده وتركه دون متابعة. ولم تنس إطلاقاً مشهد خيانة الأم لزوجها في بداية زواجهما حين ضبطتها ذات مرة مع عشيقها في إحدى غرف القصر وكنمت سرها خوفاً على حفيدها شريف الذي كانت تحبه بشغف.

في هذا «الأموسفير» الملبد بالغيوم عاشت رشا طفولتها، معسكران منقسمان.. أم وأب غريبي الأطوار يدللونها ولا يرفضان لها طلباً في مواجهة أخ ضائع وجدة يكرهانها ويشعران أن مجيئها للعالم قلب حياة العائلة رأساً على عقب.

لكن ثمة أسباب ودوافع أخرى بخلاف مناخ الكراهية الذي يمتلئ به القصر قد فتحت البوابات الكبرى التي عبرت من خلالها الطاقة السوداء في مساراتها المشثومة، حتى احتلت المكان وسكنت أركانه، وعصفت بساكنيه، حاملة السر الذي يخنتي خلف غرفه المغلقة، ونوافذه الموصدة، وممراته القديمة.

∞ ∞ ∞ ∞ ∞

في صالة التحرير كان الصحفيون مثل خلية نحل، بعضهم يجلس أمام جهاز الكمبيوتر الخاص به، وبعضهم يكتب، ومنهم من شغلته الأحاديث الجانبية، فراحوا يتحدثون ويمازحون بعضهم البعض، وهم يحتسون قهوة الصباح السريعة.

لم تغير حادثة عمارة مصر الجديدة من طباع (فدوى عبد الدايم) العضو الرابع في الفريق البحثي لـ (مسارات نون)، حيث بقيت على حالها من حب المرح ومداعبة زملائها، والنشاط المفرط والحماس الزائد أثناء انخراطها في دولا العمل.

وجميع الصحفيين يعرفون أن صفحة الحوادث في الجريدة لا يستسيغها القارئ إلا بانفراد من (فدوى) أو مجرد متابعة تكتبها فتقدم فيها جديداً في أي جريمة أو قضية تهم الرأي العام.

وكانحلة كانت حركة فدوى داخل الصلاة... لا تهدأ ولا تتوقف عن مداعبة الجميع بخفة ظل ومرح، إلى أن استقرت وانتهى بها المطاف فوق مقعدها وأمام جهاز الكمبيوتر الخاص بها وفي يدها (مج النسكافيه) تحتسي منه وتتصفح الإنترنت وصفحاتها على الفيسبوك وتويتر.

وبطبيعة الحال بدأت ملامح وجهها تنتقل من المرح للجد بعد دقائق... ثم من الجد للذهول.. وأخيرًا من الذهول إلى الصدمة، فتوقفت عن رشف النسكافيه وتركت الكمبيوتر ورجعت للخلف بمقعدها، ودخلت في حالة شرود ذهني لم تتابها منذ عام ونصف حين سقط جدار البراءة الأول جراء التحقيق في حوادث الانتحار المتلاحقة في عمارة مصر الجديدة الشهيرة.

وفجأة استفاقت (فدوى) وكأنها كانت نائمة، حين خطر على بالها ألا تحمل أوزار هذه الهواجس وحدها... فعلى الفور قامت من مكانها واتجهت نحو الغرف المحيطة بالصلاة في اتجاهها لغرفة أستاذها وأخيها الأكبر (نزار غنيم).

كان وقوفها على باب الغرفة وملامح وجهها وحدهما كافيين لكي يفهم نزار ما تريده فدوى، فالتفت لها التفاتة تسمر بعدها وجهه، وسرعان ما قرأ في عينيها كلامًا كثيرًا كله يؤكد مخاوفه.

فابتلع ريقه، وأشار إليها لكي تجلس، فدخلت في صمت وجلست، ودون أن يتكلم نظر لها نظرة سؤال، فأجابته في صمت أيضًا بأن هزت رأسها مجيبة ب: نعم!!

كان نزار قبل دخول فدوى عليه يستمع إلى موسيقى عالمية ذات مسحة صوفية، فضغط على زر الكمبيوتر لإيقاف هذه الموسيقى، وشبك بين أصابع يديه وبدأ يفركما في توتر ثم نطق أخيرًا بصوت متهدج:

- إزاي؟!

- هاقولك... واحدة صاحبتني من زمان من شوية لاقيتها باعتالي رسالة ع الفيسبوك بتقولي إنها أعصابها تعبانة ومكتنبة، ونفسها تشوفني ونخرج مع شلتنا القديمة زي زمان، قللتها مالك.. فحككت لي إن واحدة صاحبتها أوي وساكنة جنبها منكدة عليها عيشتها، بقالها شهور

- ليه يعني؟!

- مفيش بتقول إنها تعبت نفسيًا ودخلت المستشفى وراحت لدكاترة كثير ومش لاقية حل

- مكتنبة يعني؟!

- كنت فاكرة زيك كده.. لحد ما صدمتني وقالت لي الحاجة اللي تأكدت إن وراها الريحة إياها

- نون؟!

- أه طبعًا

- ليه يعني... إيه اللي خلاكي متأكدة؟!

- يا سلام... هو يعني اللي شوفناه من كام سنة ده يتنسي، ولا حتى يتحكي لحد.. وإذا قدرنا نحكيه هل حد هيصدقته؟!... ولا هيقول علينا مرضى

- برضه حاجات مش منطقية؟!!

- بص بقى اللي كان في المرة اللي فاتت ده كوم ...واللي جاي ده بقى كوم تاني خالص!!

أغمض نزار عينيه في ضيق وأسى، وأمسك بسبحته الخضراء الملقاة على مكتبه ..واستند إلى كرسي مكتبه مرجعاً رأسه للوراء متتهداً تنهيدة هم طويلة..

ماذا كان يتوقع نزار؟!.. أن تترك المسارات السوداء أحدًا طالته رياحها من قبل؟! قد تتركه أعوامًا لكنها لا تضحى بمن فهم ورأى وسمع... فتلك لغة المعذبين.. وحديث الصارخين من أعماق الجحيم.. من يندفعون في تيار الغضب وهدير الانتقام.

∞ ∞ ∞ ∞ ∞

في قصر عائلة الجداوى وقفت الخادمة ترحب بسيدتها العائدة لبيتها بعد فترة غياب، وأسرع الخادم يحمل حقيبتها إلى الدور العلوى حيث غرفتها، وبكل فظاظة وقسوة لم تبالِ رشا بحفاوة الخادمة ونهرتها بشدة قائلة:

- عملتي اللي قلتك عليه؟!!

- اللي هو إيه يا ستي؟!!

- هيكون إيه يا حمارة ... الأوضة بتاعتي جهزتها زي ما قلتك في التليفون؟

- آآآآه طبعًا...طبعًا... شلت كل الـ..

- ششششششش...خلاص إنت هترغي...غوري من وشي

تتصرف الخادمة في أسى، أمام دهشة أخيها شريف الذى يقف متعجبًا من ذلك التحول الرهيب في شخصية أخته. هو يعلم جيدًا أنها تكرهه ولا تحبه لكن هناك خيطًا من الود والملاطفة كان بينهما قبل سفره وبعده أيضًا، خاصة بعد أن علم أن كل ثروة والديه آلت إليها بوصية من الأب، وأنه هو وجدته لم ينالا إلا ما حدده الشرع، فماذا حدث كى تعامله بهذه الطريقة ولا تتطق بكلمة واحدة معه طوال الطريق للبيت؟!!

لم ينتظر شريف كثيرًا، فبادرها بكلمات حاسمة وبصوت مرتفع:

- رشا.. استتي ما تطلعيش ...إنت إيه ما عندكيش دم؟!...إنت هتطلي وتسيبيني ... بلاش علشان أنا أخوكي الكبير ...خليها علشان اللي اتدفع من جيبي في حالتك المهيبة دي ...اللي إحنا مش عارفين خفيتي منها ولا لأ

تستدير له رشا في حنق شديد، وتقرب منه في بطء وعيناها جاحظتان، وترفع سبابتها في اتجاه وجهه وتقول في عصبية:

- أنت تخرس خالص ... أنت السبب في كل اللي أنا فيه... بابا وماما كان معاهم حق ... اطلع بره ..يره بيتي.. مش عايزة أشوف وشك تاني

كان من البديهي أن يبلغ انفعال شريف مداه على أسلوب أخته الغريب معه، لكن رد فعله كان غريبًا حين قرر في ثانية واحدة أن يخرج فعلاً من القصر، بل ومن حياتها كلها التى شعر حيالها بالخوف والقلق.

- أنا فعلا خارج... خارج وسايبهالك.. أنا إيه اللي يقرفني معاكي ... أنا ناقص لبش وتوتر ... أنت البعد عنك غنيمه اشبعي بالقصر وبفلوس أبوكي وفكرك هتعرفي تتهني بحاجة ... أنت خلاص انتهيتي .. يقيتي ولا حاجة .. بكره أرجع آخد عزاكي وكل ده يرجع لي تاني
- بره بره يا حيوان بره اااااه

خلال مغادرة شريف قصر والديه للأبد كانت الخادمة تراقب المشهد من خلف أحد الأعمدة وعيناها تمثلنان بالخوف من مصيرها مع هذه الفتاة غريبة الأطوار.
وخلال ثوان كان شريف يهرول نحو باب القصر متجهاً إلى سيارته، وأخته تطارده بالسباب واللعنات والصرخات الهستيرية، وظل بصرها يطارده حتى اختفت سيارته من مرمى بصرها، ولكن قبل أن تختفي كان ما رآته سريعاً كفيلاً بأن يكف لسانها عن الصراخ والسباب.
فتمة شخص بدا في المقعد الخلفي للسيارة يصعب عليها التعرف على ملامحه لتحديد هويته.. كما لو كان وجهه ممسوحاً بلا ملامح.. لكنه ظل شاخصاً حتى اختفت السيارة من المشهد

∞ ∞ ∞ ∞ ∞

في مقهى الندوة الثقافية ميدان باب اللوق.. كان يحلو لهم الجلوس، حيث الدفء والاحتماء بالبشر والاستمتاع بدرجة من الزحام المستساغ، وأيضا لأن الدكتور مريد المدهش وحمزة التاجي اعتادا أن يتقابلا بانتظام أسبوعياً على هذا المقهى الدافئ.

فلم تجد فدوى صعوبة في تجميع وحشد فريق المعاناة من جديد، وإنما كانوا على (الندوة)... مستعدين لخوض مغامرة جديدة عبر عوالم الميتافيزيقيا وجولة ثانية مع (مسارات نون) الغاضبة.

اللهم إلا (نزار غنيم) ذلك الرجل الصلب والمستقر نفسياً، لكنه يحب أن يعيش في حالة من السلام النفسي والتأمل والاستمتاع بذكر الله وعشق آل البيت، فيكره أن يعكر صفو هذه الحالة أي عارض. حتى لو كان عهداً قطعته مع ثلاثة من الباحثين عن الحقيقة.

وما إن وضع النادل مشاربيهم الأربعة على الطاولة وابتعد عنهم نسبياً، حتى بدأت (فدوى) في الحديث عما روته لها صديقتها، وأعقبت حكايتها بتحليلها للموقف

- فدوى: أنا حاسة يا جماعة... لأ.. ده أنا متأكدة إنها وقائع متشابهة مع كل اللي عشناه وشفناه من كام سنة.. بس من جوايا عايزة أكذب إحساسي ده

- نزار: أنا بقى شايف إننا مسرفين أوى في تفسير كل شيء على إنه في نطاق (مسارات نون)، يا جماعة إحنا نسينا إن فيه أمراض نفسية وعقلية كتير ممكن تعمل هالوس سمعية وبصرية وصاحبها يكون مصاباً بالفصام أو أي مرض من الأمراض دي... ولا أنا باتكلم غلط يا دكتور مريد؟!.

- د. مريد: مش فكرة غلط أو صح... بس بيتهيا لي إننا تجاوزنا خلاص مرحلة النقاش ما إذا كانت الحوادث اللي من النوع ده مرض نفسي لصاحبها ولا تخش في الإطار اللي كلنا عارفينه

أنا لسه لحد دلوقتي ماشي في الدراسة اللي كنت قلتكم عليها علشان أسجل الاكتشاف ده باسمنا إحنا الأربعة، بس باحاول أتقنها بحقائق علمية وأسانيد أكثر

علشان كده أنا باعتبار إن وجود حالة ثانية تثبت علمياً فكرة (مسارات نون) دي فرصة ما تتعوضش علشان أقدر أدم بيها الدراسة، وننبه البشرية والناس من نوع مختلف وغريب من الأمراض (النفس مجتمعية) حسب ما باوصفها في الدراسة.

- فدوى: بالراحة علينا يا دكتور... إحنا صحفيين مش زيك أنت وحمزة في قصة (السيكولوجي) دي... يعني حضرتك تقصد إنك لسه عايز تتأكد من وجود حاجة اسمها (مسارات نون) ولا لأ؟!!

- د. مريد: ده كلام برضه يا فدوى... هو إحنا يا جماعة هنفضل نعيد ونزيد ونرجع نفسنا ألف خطوة لورا... أمال كل العذاب اللي شفناه مع بعض ده كان إيه؟!... ما تتكلم يا حمزة أنت ساكت ليه من أول القعدة؟!!

- نزار: يا عم ده طالب كاكوا باللبن... ده في الطراوة ومش معنا خالص... انت إيه يا عم واكل سد الحنك ولا إيه؟

- حمزة مبتسماً: لا ولا ساكت ولا حاجة... القصة كلها إني مستغرب إزاي لسه بنتناقش في حاجة المفروض إننا عايزين نثبتها لملايين من البشر حوالينا، ومتأكدين إن صعب حد يصدقنا... لكن الكوميدي إننا ما نبقاش مصدقين نفسنا...

م الآخر يا نزار مع إنك حبيبي من زمان وعارف إن دماغك ثقيلة وتفكيرك عميق، وعندك رصيد كبير من الإيمان بالغيبات واللامرئي نتيجة لثقافتك الدينية، لكن أوقات بتفقد لياقتك وقوتك في المناطق دي... ومش بالوم عليك والله... لكن الصراحة... كونك أنت وفدوى لحد دلوقتي بتسمعوا لكن ما شفتوش بعنيكم فده مخليكم كل فترة تفكروا وتسالوا نفسكو... إحنا إيه اللي بنعمله ده؟!... هو إحنا كده طبيعيين؟!!

- نزار ضاحكاً: يعنى هو لازم أشوف عفريت ميت قصاد عيني ولا أسمع ندهة من المخدة علشان أتطب ع التراك يا عم حمزة؟!... ده أنت غريب أوى والله!!

ينفجر الكل في الضحك.. مما يخفف حدة وسخونة النقاش، ويفتح المجال لكي يبدأ الأربعة رسم خريطة المعاناة في مغامرتهم الجديدة

∞ ∞ ∞ ∞ ∞

ما أصعب أن يفنى المنطق!!

ويا لبشاعة الشعور بتعطيل الحقائق العلمية!!

عندها قد تتهم نفسك بالجنون.. أو تجنح لخرافات وأوهام، كي لا تستسلم لفكرة أنك بصدد محض هلاوس!!

وفي اليوم الذى فتحت فيه بوابة الأرض الشمالية لتمر الطاقة السوداء عبر مساراتها البركانية، كان البشر قد تجاوزوا مداهم المحتمل في الشر والحقد والخيانة، فأفسدوا الفطرة ونالوا من السلام النفسي والاجتماعي للكوكب المعذب.

هذه الحقيقة التي لا يدركها من وقعوا في مرمى حمم (مسارات نون) السوداء، فهي طاقة كما أكد مكتشفوها تسير وتتشعب وتتشظى انتقائياً، وليس عشوائياً... فهي

تعرف من تختار ليكون فريستها

مسارات نون طاقة ليست عمياء، بل تنفذ إرادة الله في تحقيق التوازن والعدل، فتنتها الحقيقية في صعوبة إدراكها والإحاطة بها... لأنها تستخدم سلاحًا لا يقاوم.. يفنى خصمها فناءً بطيئاً... حين تضربه في ثوابته ونواميسه المستقرة، فيصبح الكون في نظره حظيرة عبث... وتغدو الحياة لا قيمة لها...

وعندئذٍ يتبدي السقوط من أعلى نافذة حلاً مخلصاً.. ودواءً ناجعاً...

هكذا رأيت (رشا الجداوي) طريق الخلاص، بعد أن وقعت فريسة في دوائر العذاب ولم تجد بداً من الحياة..

لقد اختارت الوقت والمكان واللحظة فصعدت بعد أن نام الخدم إلى أعلى نقطة في القصر، وكانت وهي تسير في ممرات القصر، وتصعد سلالمه تهرولاً وتبكي بكاء هستيرياً كمن يهرب من سياط تنهال على جسده، بل صارت تلوح بيديها في الهواء وكأنها تشيح عن وجهها سرب من النحل أو الحشرات الطائرة...

لم تخجل رشا أو تخش افتضاح أمرها وهي تبكي بأعلى صوتها، وتصرخ من أعماقها فقد كانت ترى أنها تهرولاً نحو الخلاص

وقفت حافية القدمين، يعصف بجسدها الهواء البارد، فوق أعلى حافة في القصر.. وتيقنت تمامًا أن بينها وبين الراحة تلك القفزة

الآن... توقف الصراخ..

لا صوت إلا سكون الليل..

القصر الآن يخلو من سكانه الأصليين...

هل تحكي جدرانه ماذا جرى في سنوات الصخب والضجيج؟

∞ ∞ ∞ ∞ ∞

- لأبقى... مش ممكن هو إحنا موعودين.. إيه الحكاية... ده نفس السيناريو!!

هتف بها (نزار) متعجباً من تشابه الأحداث والنهايات، بعدما سمع من فدوى خبر انتحار رشا، التي كانت ترقب أخبارها عن كثب من خلال صديقتها وجارتها الوسيطة بينهما

- ده صاحبتي مش مصدقة لغاية دلوقت... رغم إنها بنقول إنها اتبهذلت وتعبت أوى في آخر أيامها وإن حالتها في المصحة النفسية كانت أحسن بكثير...

دي بنقولي إنها كانت بتسمع صوتها بتصرخ كل يوم بالليل وتعيط بحرقه.. مع إنها لما كانت بتزورها في المصحة قبل خروجها كانت بدأت تتحسن شوية

- د. مريد: طب وشعرها برضه كان نفس الحكاية!؟

- فدوى: طبعاً... ماهي نزلت على تليفون من الشغالة وأول ما وصلت لاقنتها حطام على الأرض وشعرها أبيض، وهتجنن من ده لأنها مش عارفة السبب... وآخر مرة شافتها كان قبلها بأسبوع والشعر الأبيض كان مجرد خصلات خفيفة

- حمزة: طيب... يبقى كده من الواضح إن البنت دي وراها قصة كبيرة برضه وغالباً عملت عملة سودا دفعت تمنها.. كل ده بقى بالنسبة لي مش مهم

ولكنه أرجأ تلك الخطوة لحين الاطمئنان على حالة الهياج والنفور من الفكرة ككل، التي انتابت (فدوى)، مما ألقته على مستقبل الفريق البحثي، حيث إن (طاقة نون) في الوضع الراهن أصبحت هي التي تطاردهم وتبحث عنهم وليس العكس، لذلك فإن حمزة والدكتور مريد، أصبحا على قناعة تامة بأن مواجهة هذه الظاهرة بحثيًا وعلميًا صار فرض كفاية، عليهم أن يقوموا به ليسقط عن الباقيين.

نهض الثلاثة وغادروا المقهى في حالة قلق وتشتت، بحثًا عن نقطة البداية وطريقتها، وهل ستمهلهم (المسارات) حتى يفكروا أم سترسل لهم ما يحفزهم من جديد صوب حياة استثنائية عليهم أن يعيشوها دونًا عن كل البشر؟!!

كان (نزار) هو أول الواصلين لبيوتهم، بحكم قرب مسكنه من المقهى حيث يستأجر منذ سنوات شقة صغيرة في شارع هدي شعراوي ليكون قريبًا من (وسط البلد)، وبدا حريصًا على الاتصال بـ (فدوى) التي لا ترد على هاتفها المحمول كما قررت، فعزم على الاتصال بهاتف منزلها، ولكن بعد مدة يسيرة أعطها لنفسه، يتناول فيها طعامه ويصلي ليضمن وصولها بيتها الذي يبعد عن وسط البلد عشرات الكيلومترات، وحتى لا يسبب القلق لأمها التي تعرف (نزار) جيدًا كأخ أكبر وزميل عمل لابنتها.

دخل (نزار) بيته في حالة دهشة لثوان معدودة، فهو بحكم العادة يترك (لمبة) مدخل البيت موقدة ليل نهار، فقال لنفسه لعلها احترقت، ولكن دهشته زالت تمامًا حينما كاد أن يخر صريعًا من المفاجأة التي كانت تنتظره في الصالة الداخلية، بعد أن أوقد المصباح.

!!Surprise

قالوها في وقت واحد بمرح وحب، ملتقين حول تورتة كبيرة عليها صورته، والسعادة تملأ وجوههم، والذعر والغثيان يملأ وجهه!!

إنهم (حبيبة وزينة وفرحة) بناته، وزهرة عمره، وتقف خلفهم في وضع منظم الحفل ومهندس المفاجأة أمهم (طليقة) نزار، في أبهى صورها، لدرجة أنها لم تتألق على هذا النحو منذ فترة طويلة خلال سنوات زواجهما!!

ابتسم (نزار) وأخذ بناته في حضنه، ثم سلم على زوجته بتحفظ متعمد..

نسى (نزار) همومه في لحظة وانغرس وسط بناته وصار يداعبهم ويقبلهم ويستمتع لحديثهم... تاركا (إيمان) طليقته تقوم بتقطيع التورتة لهم دون أدنى اهتمام بها، وفجأة استفاق وانتبه لمعطيات حياته الجديدة، فأصابه الشroud، وتوالت في ذهنه مئات الأفكار السريعة حدث نفسه بها:

- والله مفاجأة حلوة... صحيح كانت هتقطع لي الخلف... بس أهي حاجة تخفف شوية من جو اللبس اللي حطنا فيه حمزة والدكتور مريد!!

والبنات برضه كانوا واحشني جدا... لكن مش طالباهم في ليلة زي دي... يا عالم مستخبيلنا فيها إيه

وبعدين أظن إزاي دلوقت على البت (فدوى)، زمانها تبقى وصلت بيتها دلوقتي... وطبعًا لو جيت أتكلم، المحروسة هتسألني مين دي... وتكلمها ليه في ساعة زي

دي.. ومش بعيد تتهمني قدام الولاد بإنني فلتن وعكاك ومقضيها علاقات محرمة...
ولا كأننا متطلقين!!

أهي طبعًا جايه على سنجة عشرة وموضبه نفسها، ونازلة تماحيك، لكن على مين...
على بابا.. ده أنا قديم وقاريكي... وأنا أهبل علشان أرجع تاني لجو الخنقة والكهربا
اللى كنت فيه ليل نهار..

لم تمهله (إيمان) كي يسترسل في أفكاره، فقطعتها حين طلبت من بناتها بحزم:
- وبعدين يا بنات... كفاية رغي بقى... كلتوا ودان بابا... ينفع كده.. يالا قوموا ع
السفرة كلوا التورته أنا جهزتلكم أطباقكم

(نزار) في سره: وحياة أمك!!

- (البنات): يا ماما بابي واحشنا أوى.. بقالنا كثير ما شفنا هوش

- (إيمان): معلش.. ما إحنا قاعدين معاه حبة.. قوموا كلوا التورته.. علشان عايزة
بابي في حاجة.

(نزار) في سره: آآآآآآه... قابل يا حلو... دي يا عايزة فلوس يا عايزة ترجع... ربنا
يستر!!

اقتربت (إيمان) بود ولطف من (نزار) وهي تبتسم، فبادلها ابتسامة مصطنعة

- إيه يا سيدي... فينك.. لاقيتك ما بتسألش ع البنات قلت أجيبهملك وأجي.. وما
لقيتش أحلى من يوم عيد ميلادك اللي أنت أكيد مش فاكره زي ما كنت بتتسى
مناسبتنا كلها... ولا يمكن عندك حد يفكرك بيه ويحتفل معاك كمان

- هههههههههه... عارفة يا إيمان... ألد حاجة فيكي إنك من يومك تسألني عشرين
سؤال وتجاوبي عليهم من دماغك في نفس الوقت... وطول عمرك خيالك واسع على
فكرة... برافو... ده هايل جدا

- إيه الغلاسة دي... أنت علطول ردك حاضر كده باتهامات وخلص

- أنا برضه؟!!

- خلاص خلاص... مش مهم... قولي بقى.. إيه رأيك في المفاجأة دي؟!!

- عظيمة!!

- طب ابقى قولي كمان رأيك في هدية الولاد علشان أنا اللي منقياها

- آآآآه طبعًا من عيني

- أخبارك إيه بقى؟!!

- بمعنى؟

- جرى إيه يا نزار... إيه السخافة دي... مال ردودك كلها ساقعة كده؟!!

- ساقعة إزاي؟

- بترد على قد السؤال... ومش طايق كلامي... تحب أقوم واخذ والولاد وامشي؟!!

- أنا قلت كده؟!.. بس آآآ

يندفع صوت صرخة نسائية مفزع من فم المتحدث، لا يجد معها (نزار) بدا من إلقاء السماعه بعيداً على الأرض فتظل ترتجف أمامه كأن أحداً يحركها، وصوت الصراخ يتواصل بشكل جنوني من السماعه، حتى يغلق (نزار) الخط.

وخلال دقائق كان مستقلاً سيارته متجهاً لإنقاذ زميلته، وهو غير مصدق لما يحدث ولا يجد له تفسيراً، كل ما استطاع فعله هو الإمساك بسبحته وترديد الأذكار والأدعية والتحصينات طوال طريقه الطويل من وسط البلد إلى التجمع الخامس، حيث منزل (فدوى) التي لا يعلم أهي على قيد الحياة أم لا.

∞ ∞ ∞ ∞ ∞

إذا كانت الصداقة بين (حمزة التاجي) وبين الباحثة الألمانية البروفوسيرة (جوليا شتايندورف)، وطيدة منذ ما يقرب ٤ أعوام، فهي الآن بعد أن توحدت أهدافهما البحثية على صعيد واحد أكثر توطداً.

وإذا كان (حمزة) بما رآه وسمعه وعاشه من أهوال تفزعه وتؤرق حياته خلال تجربة عصبية، تماست مع إحداثيات مسارات (نون)، يعتبر من ضحايا مواجهة هذا النوع من الطاقة أو الكائنات اللامرئية، فإن د. جوليا ومعها مكتشف هذه الطاقة من قبلها الدكتور (لوبان) الفرنسي، قد انخرط في نوع غريب من الحياة، جعلتهما يعتادان رؤية وسماع ما يملأ من قصص الرعب والإثارة مجلدات وكتب!!

وكعهده معها كل فترة قصيرة أن يحدثها ويسأل عن مستجداتها البحثية في هذا الصدد، جلس (حمزة) يجري محادثة طويلة مع صديقه عبر (الشات) ويطلعها على أهم ما يحدث لديهم في مصر

- الغريب يا د. جوليا أن درجة الثبات في مواجهة طاقة (نون) يتفاوت من شخص لآخر داخل فريقنا البحثي، وكنت أتصور أن مجرد اختيار شخص معين ليدخل هذه الدائرة، فهو على درجة من الثبات المعرفي والفهمي ما تكفيه ليصمد أمام ما يرى

- من أين لك بهذا التصور الخاطي؟!

- لماذا؟!... ألم يؤكد د. لوبان والباحثون في المركز لديكم أن مسارات (نون) ليست عشوائية بل محددة، وإحداثيات اختيارية؟!

- هذا كان التصور الأولي الذي لم نجد حتى الآن ما يثبتته أو ما ينفيه... لكن الأقرب للحقيقة العلمية وللسنن الكونية أنها طاقة سلبية من الدرجة القصوى، التي ربما تؤذى وتضر بما حولها وداخل نطاق انتشارها أيا كان هذا الشخص

- مستحيل!!

- أي مستحيل؟!

- ما تقولينه الآن...

- لماذا؟!!

- لأن معناه خطير ومرعب... لقد تصورنا وساعدنا على ذلك طبيعة ثقافتنا الشرقية أن مسارات (نون)، طاقة تختار وتستنين، ربما تحركها قوى السماء لكشف الحقيقة وتحقيق العدل

كانت فدوى قد حظيت بزيارة منتصف الليل، فور دخولها منزلها، متجهة إلى غرفتها في حالة اكتئاب شديد من الفكرة برمتها، واتخذت قرارًا لا رجعة فيه ألا تشارك بقية زملائها ما عزموا عليه، وأن تتناسى القصة كلياً، لكن الظروف والملابسات تأبى إلا أن تكون طرفاً فاعلاً في الأحداث، وهل دخول الحمام مثل الخروج منه؟!

في البداية، وجدت فدوى على الأرض بجوار سريرها صورة فوتوغرافية لسيدة سبعينية تبدو عليها علامات العز والثرء، تبتسم ابتسامة الملكات وترتدي قبعة أرستقراطية على رأسها، وتزين وجهها نظارة تزيدها تألقاً وأناقة، فتعجبت منها وذهبت على الفور نحو أمها لتسألها عما إذا كانت هذه الصورة لإحدى صديقاتها أو تخصصها.

- ماما... ماما

- أبوه يا حبيبتي

- بتاعة مين الصورة دي؟!!

- أنهي صورة؟!... وريني... ما أعرفش

أجابت الأم بالإجابة التي لم تكن تتمناها (فدوى) ولكنها كانت تتوقعها.. فكررت السؤال:

- ماما... أبوس إيديك أنا مش ناقصة توتر... افكري لتكون وقعت منك... يعني هو مين جه عندنا ولا ممكن يخش أوضتي غيرك؟!!

خلال حديث فدوى كانت عيناها وهي تتكلم تقعان على الصورة، كل ثانية، فذهلت حين وجدت فيها اختلافاً ما، مما جعلها تستمع لكلام أمها كأنه هواء... صمت!!

كان الاختلاف عن الصورة الأولى أن السيدة العجوز الآن لا ترتدي قبعة بل حاسرة الرأس ويبدو شعرها في درجات بين الذهبي والأبيض ولكن بنفس الابتسامة ونفس الملامح والنظارة

- الأم: فدو!!!! مالك.. انت مش سامعاني.. أنا باكلم نفسي

- ها.... أبوة يا ماما سامعاكي... مش عارفة.. مش عارفة

- مالك يا بنتي مالك بس... فيكي إيه بقالك كام يوم غريبة وقافلة على نفسك.... ده انت كنتي ما بتبطليش ضحك!!!

- هاموت يا ماما... هاموت... مش قادرة

- احكي لي يا بنتي... مالك... حصل حاجة في الشغل?!!

قبل أن تجيبها (فدوى) سرقت عيناها نظرة خاطفة للصورة مرة أخرى لتجد السيدة العجوز، بدون نظارة واختفت الابتسامة من على ملامحها، واكتسى شعرها تماماً باللون الأبيض المخيف، وبدا متناثرًا

هنا تخلت (فدوى) عن ثباتها وتماسكها أمام والدتها، وقذفت بالصورة بعيداً، وانتابتها نوبة صراخ وبكاء هستيري، وتوقعت فوق الأريكة في وضع الجنين، في حين أصيبت أمها بالهلع خوفاً على ابنتها وصارت تبكي وتنادي على جيرانها.

فرض الهدوء نفسه بعد إغماء (فدوى) وحضور الطبيب بصحبة بعض الجيران، لتهدئة أمها، التي ابتلعت هي الأخرى مصيبتها حين راحت تحكي للجيران ما حدث، مستعينة بالصورة التي صنعت كل هذه الضجة فلم تجدها... إنه السيناريو الكلاسيكي في أي فيلم رعب مصري تحديداً، أن تختفي ملابسات الموقف الذي ترويهِ الضحية فيتصور السامعون أنها مختلة عقلياً... تماماً كما حدث ليسرا في فيلم الإنس والجن حين كانت تناديهم من الستائر التي أحرقها عادل إمام فيدخلون ليجدوا كل شيء على ما يرام.

في هذا التوقيت كان (نزار غنيم) يتصل على التليفون الأرضي، ولا يجد من يرد عليه سوى العجوز الشقراء (إحسان هانم المانستيرلي)

فمن تكون هذه الأسطورة بخلاف أنها جدة (رشا)، وكفى بذلك مفرعاً ومثيراً؟!..

∞ ∞ ∞ ∞ ∞

وصل الجميع مصحة الدكتور الزيات العملاقة، ودخلوا يتقدمهم (د. مريد) بكل ثقة.. لا لأنه نسق موعداً معه بعد اتصال هاتفي بينهما، ولكن لأن علاقة الندية بينهما، وكونه طبيباً نفسياً مشهوراً وابن أحد أقطاب طب المخ والأعصاب في مصر جعله هو الأفضل لهذه المهمة، ولكنه قرر وأصر على أن يصطحب معه (نزار) و(فدوى)، لعل فهمهما للحالة النفسية للمريضة (رشا) يخفف عنهما ما سمعوه وشاهدوه حتى الآن.

كان لقاء القطبين حميمياً بما يخالف العادة الجارية في أن (عدوك ابن كارك)، وكانت حفاوة د. هاني بالدكتور مريد بالغة.. رغم أن الأخير أصغر سناً بما يقرب من عشر سنوات. مما يعطى للدكتور هاني هيبة الأقدم والأكثر خبرة

وللوهلة الأولى تصور د. هاني أن (نزار) و(فدوى) مرضى من أقارب الدكتور مريد، وأتى بهم للحجز في المصحة، فحالة الإرهاق والترهل التي كانا عليها دعمت هذا التصور، إلى أن بدأ د. مريد حديثه فوراً بتقديمهم ثم بادر بدخوله مباشرة فيما يريد.

- د. هاني... يمكن أنا ما وضحتش لحضرتك أنا عايزك في إيه بالظبط، وده أسعدني أكثر إن حضرتك رحبت بالميعاد من غير ما تعرف هنتكلم في إيه

- يا دكتور مريد... ده مكتبك ومكانك... وحضرتك أستاذ كبير تشرفني في أي وقت - ربنا يخلي حضرتك... القصة بدون ديباجة إني جاي أعرف تفاصيل عن حالة المريضة (رشا الجداوي) اللي كانت بتتعالج على إيد حضرتك هنا في المصحة، وطبيعة مرضها الغريب جداً، لأن المعلومات اللي واصلت لنا كلها مشوشة، ومن واحدة صديقتها وبالصدفة طلعت تعرف (فدوى) زميلتنا..

يعني حكي تليفونات... وطبعاً اللي كانت بتشتكي منه ده لوحده ظاهرة تستحق الدراسة، ويهمني أنا شخصياً إني أفهم طبيعة مرضها بشكل علمي دقيق، وده طبعاً من خلال حضرتك باعتبارك نجحت في علاجها إلى حد ما

- إيه اللي عرف حضرتك إنها خفت؟!!

- أنا ما قلنتش خفت... بس برضه المعلومات اللي وصلت لي من خلال صاحبيتها بنقول إنها خرجت بارادتها بعد موافقة حضرتك من هنا، وانتكست تقريباً بعد ما

وقبل أن يجري مكالمة هاتفية للدكتور (مريد) ورفاقه للاطمئنان عليهم في مهمتهم، نظر للساعة فأرجأ اتصاله قليلاً، متوقعاً لهذه الجلسة أن تكون طويلة، ففيها السر وبيانه.

ولكنه تذكر ميعاد عمله المسائي الثابت في الشركة التي يعمل بها، فنهض على فوره من مكانه، ليستعد للنزول متمتماً:

- والله شكلنا هنتر فدم الشغل بسبب الغم اللي شايفينه ده... خليها تكمل من كله خلع (حمزة) ملابسها في عشوائية يعتادها وألقى بها بين سريره والأرض، واتجه وخرج من غرفته بملابسه الداخلية، متجها للحمام وهو على علم بأن والده خارج البيت ليأخذ حماماً بارداً كما يحبه، وابتسم ابتسامة مستفزة لأمه الجالسة أمام التليفزيون في الصالة، وكأنه يتوقع ما ستقوله:

- تصدق إنك معندكش دم... إيه اللي أنت لابسه وماثي بيه ده... أنت حر إن شاء الله تاخذ برد.

فتوجه نحوها وقبلها مداعباً إياها، فدفعته في ود كامن:

- امشي ابعدي عني.. امشي

ما أجمل اللحظات الصافية.. والدافئة في هذه الحياة..!!

وما أروع أن يستمتع الإنسان بنعمة الأمان، حتى ولو كان لحظياً مؤقتاً..!!

وما أقسى تحولات القدر بين الأوقات الآمنة الهادئة وبين تلك المزجة العصبية!!

يبدو أن رياح الأرواح المكلومة تجيد اصطيد أوقات هبوبها، وتعرف متى وأين تسير

دخل (حمزة) الحمام ووقف أمام المرأة لحلاقة ذقنه قبل الاستحمام وفجأة... سأل نفسه سؤالاً: هل ما يسمعه الآن إحساس وهمي من تراكمات هواجسه التي لا تتوقف، وكوابيسه النمطية المعتادة؟... أم هو حقيقة ككل ما سبق؟!!

إنه صوت أنفاس بشرية... نعم... هناك من يتنفس بجواره.. ولكن ليس هناك أحد حوله في حمام لا يتجاوز عدة أمتار يبصر بنظرة واحدة كل أبعاده...

لا... ليست كل أبعاده.. ثمة ركن خلف تلك الستارة... وما أغباها وما أقساها من ستارة تخفي وراءها ذلك الآتي المجهول.. لا سيما وأن صوت الأنفاس ينبعث من هذا الاتجاه!!

الأنفاس تتعالى... تتسارع..

(حمزة) يتصبب عرقاً، وتندافع في ذهنه مئات الهواجس..

أعظمها أنه يلعن ذلك اليوم الذي قتل فيه جاره وانخرط في تلك الحياة المجهدة... وأدناها أنه الآن في الحمام... وما أدراك ما الحمام في تراث الرعب الأدبي والسينمائي... والأنكى من ذلك أن الستارة تغطي ركن (البانيو)... ومن هو (البانيو) الذي قتل على يد المخرجين والمؤلفين بحثاً، وامتلاً بالآلاف الجثث

لكنها حياته الجديدة... عليه أن يتقبلها دون أدنى مناجزة.. الآن فقط قرر (حمزة) ألا يهرب لخارج الحمام وأن يتقدم لفتح الستارة..

- كده يا دكتور (هاني) أبقى بريء علمياً وأخلاقياً قدام حضرتك كشاهد على حدوث ظاهرة مهمة زي دي.. ممكن تغير شكل الحياة على الأرض وممكن علمياً نفهمها ونعرف نتكيف معاها ونسيطر عليها... سواء كان ده بتكنولوجيا معينة.. أو من خلال ثقافات وقناعات دينية أو تنمية بشرية أيا كان... المهم إن القصة مش بسيطة ولا ونقدر معاها نطنش ونضيع الوقت...

قالها (د.مريد) وهو يطفىء سيجارته

الدكتور (هاني) يتنهد بعمق، ويرجع بكرسيه للوراء مسترخياً عله يستدعي الراحة لذهنه الذى عرف كثيراً وامتلاً بعظيم.. ثم يوجه نظره لـ (فدوى) مبدئياً علامات التعجب والحيرة والشفقة على حالهم أيضاً

- نزار: دلوقتي يا دكتور هاني جه الدور على حضرتك علشان نقدر نفهم ونوصل لحاجة في اللي بيحصل حوالينا ده

فيه مشكلة ما... فيه مصيبة حصلت... فيه جريمة جايز... أي حاجة تخلي الطاقة السلبية دي... أو الروح المعذبة دي... غاضبة ومتوزعة ومنتشرة لحد ما ترتاح وتهدى

- د. هاني: إيه الكلام غير العلمي ده يا أستاذ نزار؟!!

- نزار: يعني انت سايب اللي فات كله وجاى على الكلمتين بتوعي وتقولى غير علمي!!

- د. هاني: مش قصدي.. أصلك بتقول كلام غريب... أرواح غاضبة... وتتوزع وتهدى.. ده كلام أفلام!

د. مريد: يا دكتور هاني... ما أنا شرحت ل حضرتك التوصيف العلمي للي بيحصل، نزار بيتكلم معاك ببساطة....

بص... انسى اللي قالهولك نزار.... وانسى كمان (رشا الجداوي)... إحنا دلوقتي بعد إذن حضرتك عايزين نعرف توصيفك العلمي لمرض (رشا) اللي حضرتك كتبت عنه تقرير كامل وطبعته كمان زي ما قلنتلى امبارح...

اعتبرني زميل جاى يتعلم من حضرتك، وياخد درس في الحالة الجديدة اللي حضرتك سميتها أآآآ... على ما أتذكر..

- د. هاني: هيسستيريا الصورة

- د. مريد: أيوآآ هيسستيريا الصورآآ... هي دي

- د. هاني: بس أنا ما سمعتش رأي الأستاذة (فدوى) يعني... وليه ساكتة من أول القعدة؟!!

- نزار (غاضباً): يا دكتور أبوس إيدك ركز معانا.. وسيبك دلوقتي م الأستاذة فدوى... ممكن حضرتك تدينا حتى من غير شرح التقرير المطبوع ده

يببدو أن (نزار) أدرك من خلال مراقبته للدكتور هاني، طبعه الذى لا يعرفه عنه سوى المقربين منه والعاملين معه في المصحة، أنه يحب مغازلة الفتيات الصغيرات، ودائماً ما يتعرض للعديد من المشكلات بسبب ذلك.

- أيوا أنا هاني... باقولك أرجووك ساعدني... أنا مش عارف أعمل إيه؟!.. استعنت بكل قوتي وخبرتي في تهدئة المرضى وأنا مش لاقى حل لنفسي
- طب وأنا أقدر أساعد حضرتك إزاي وبإيه دلوقتي واحنا داخلين ع الفجر؟!..
- مش هاقدر أحكيك في التليفون.. ممكن تيجي حالاً
- ما هو أنا مستحيل آجي إلا لما تعرفني إيه اللي حصل يا دكتور
- رشا الجداوي
- مالها؟!..
- لسه عايشة... ولسه خارجة من مكنتي من عشر دقائق!!

∞ ∞ ∞ ∞ ∞

طلعت الشمس وانقضى الليل... ولكن ما جدوى ذلك إن كانت حركة كواكب ليس أكثر، والخوف والذعر حالة لمستمرة لا تتقطع، ولا تعرف ليلاً من نهار..
 نام (حمزة) و(فدوى) بفعل الحبوب المهدئة.. ونام (مريد) بعد طلوع الشمس أيضاً بفعل الحبوب المهدئة، ولكن في بيت (نزار)، الذي حصل على نصيبه من الطاقة الإيجابية عندما صلى الفجر حاضرًا في مسجد السيدة نفيسة، ولم يسكن حتى زار المقام وبكى على أعتابه المقدسة، ثم أقنع د. مريد بالمبيت معه معنترًا لزوجته بأنه اضطر للمبيت في المستشفى.

فتناول مع شروق الشمس، إفطارًا شريقًا دسمًا مع صديقه الجديد، سهّل عليه مهمة النوم دون مهدئات، وعلى صوت أثير إذاعة البرنامج العام، خلد للنوم بمجرد أن سمع صوت (على الحجار) ينشد نثر البرنامج الشهير (مع الذاكرين) ويشدو:
 (أتيت أطلب غفرانًا تقر به عيني.. ويفرح قلبي في تقربه... يا غفارااا)

نام الجميع فلابأس من هدنة، تهدأ معها النفوس، لتواصل المسير بحثًا عن حقائق مؤلمة، وصادمة ومخيفة... ولكنها تمنح نفوسًا أخرى في عالم آخر السلام والراحة.
 كان أول المستيقظين (حمزة).. وذلك بفعل كابوس جعله ينهض مفزوعًا، ليجد نفسه في غرفة والديه وبجانبه أمه تغط في نوم عميق، ففهم فورًا أنها أقنعت والده بأن يذهب لينام في غرفة ابنه.

لكنه اكتشف فور خروجه من الغرفة استحالة أن يقبل والده ذلك، فهو يمقت كل سلوكيات حمزة، ولا يطيق هواء غرفته ويعتبره مسممًا، وملوثًا بأفكار وقراءات وحياة فوضوية بوهيمية غريبة لا تروق له ولا يفهمها..

لذلك اختار والده أن ينام في (الصالة) على (الكنبة)، فاقترب منه حمزة وتأمله وهو يغط في نوم عميق، وابتسم ابتسامة تحمل مسحة حنين ممزوجة بشيء من الغبطة أو الحسد.. وقال محدثًا نفسه:

- يا بختك يا بابا... اخترت بمزاجك الحياة اللي تريحك... زي ما أنا اخترت بمزاجي الحياة اللي تتعبنى!!

ثم ألقى نظرة بعيدة للحمام الذي يشعر برغبة ملحة في دخوله، لكن هيهات بعدما شاهده بعيني رأسه بالأمس..

كانت صورة حية لا تتمحي من ذهنه.. ومشهد عصي على النسيان..
حين فتح الستارة ليجد سيدة عجوز غارقة في البانيو المملوء بالماء، وتحاول التنفس
بصعوبة رافعة يديها النحيفتين في الهواء وتتنظر له باستعطاف لينقذها، وصوت
أنفاسها يتعالى، فهرع إلى خارج الحمام صارخاً بأعلى صوته.
لم يقوَ حمزة بالأمس على مجرد رواية ما حدث أمامه لرفاقه.. فأرجأ ذلك لوقت
يستعيد فيه توازنه وقواه النفسية والعصبية...
ويبدو أن هذا الوقت لم يحن بعد.. حيث دلف حمزة إلى غرفة والدته فوراً رغم
سطوع شمس النهار، فحشر نفسه داخل حضنها الدافئ المريح... لينام مجدداً...
فحزن الأم عالم وبلاد تعجز عن اختراقها أعتى قوى الأرض شرًا!!

∞ ∞ ∞ ∞ ∞

كان إغلاق الدكتور مرید لهاتفه بالأمس حلاً رائعاً لكي يفلت من القنبلة التي ألقتها
في وجهه د. هاني، وبناء على نصيحة (نزار) الذي لم يشعر بأدنى ارتياح لشخص
الدكتور هاني... خاصة بعد نظراته المريية لـ (فدوى).

فاقتنع بسرعة، وقرر أن يؤجل المعاناة عدة ساعات، متوقعاً جميع الاحتمالات
المفزعة بعدما قاله الدكتور هاني، وتأكيده أن (رشا) بشحمها اولحمها كانت عنده
في غرفته... ماذا فعلت ولماذا حضرت؟!... هذا ما قرر أن يعرفه في اليوم التالي من
الدكتور هاني إن بقي حياً..

لكن مبيت الدكتور مرید عند (نزار غنيم) جعله، يدرك أن هذا الرجل حقاً وبدون
مبالغة هو الأكثر صلابة فيهم، وهو الوحيد القادر على تناسي ما يرى أو يسمع من
خوارق هذه المسارات الملعونة، ربما بسبب هذا الخليط الثقافي والديني والفلسفي
الذي يعيش به، وربما لاتصاله الذي لا ينقطع بالسماء وإيمانه بوجود قوى مهيمنة
على الكون مهما تعالت مخاوفه وارتفع صحبه.

- صباح الفل يا دكترة

- صباح النور يا عم نزار..

- يا رب تكون نمت كويس.. أوضة البنات بحري وهوها حلو..

- لا الحمد لله... ده نمت نوم بقالي شهور ما نمتوش... مش عارف أشكرك إزاي

- على إيه ياعم... هو أنت فاكِر إن أنا كان هيجيلي نوم لولا أنت جيت تبات معايا...
هي الليلة كانت لبش وطالبة إننا نونس بعض... يالا ياعم قوم فوق كده واغسل
وشك... وحصلني ع البلكونة علشان عملت فنجانين قهوة يتحلف بيهم.

ضحك (د. مرید) وقام وفي نفسه يقول:

- با بختك بدماغك يا عم نزار... فعلاً صوابك مش زى بعضها!!

وفي (بلكونة) نزار جلس الإثنان يحتسيان القهوة، وكل منهما يخشى أن يفتح الآخر
الحديث في ما يؤرقهما... ولكن لا بد من ذلك

- الدكتور هاني كلمك تاني؟!!

سكت (نزار) لبرهة وكأنه تذكر شيئاً

- إيه سكت ليه مرة واحدة كده؟!!

- هو إحنا ما حكينا لكش على اللي حصل لفدوى وخلاها تعبت كده

- لا.. أنا تصورت إنها متضايقة من الفكرة من يوم ما اتعصبت علينا في القهوة وسابتنا ومشيت... إيه حصل إيه؟

- أصلها ما كانتش عايزه تحكي لحد... وبالعافية حكيت لي وحلفتني ما أقولش

- بس طبعاً إنت هتقول... أصلها ما فيهاش حلفتني

- لا طبعاً ما فيهاش...

- خير؟!!

- (فدوى) اللي مجننها إنها تعرضت تقريباً لحكاية هيسثيريا الصورة دي... وعلشان كده أنا مش حاسس إنه مرض قد ما أنا شايفه رسالة عايزة توصل لنا من العالم الآخر

- إزاي الكلام ده حصل؟

- في اليوم اللي جينا لك فيه وحالتنا زي ما شفت.. لاقيت صورة لست عجوزة شكلها أرسنقراطي جداً بس مش مريح.. صورة فوتوجرافية مش ع الموبايل

- أيوا أيوا... فاهم فاهم

- الصورة دي اتغيرت خلال دقيقة واحدة كذا مرة لحد ما بقى شكلها مفزع... فانهارت ووقعت من طولها لولا أمها والجيران لحقوها بدكتور

- إنتوا إزاي تخبوا عليا حاجة زي كده...

- اللي حصل بقى... المهم إني خمنت تخمين غريب بس شكله صح... الست العجوزة دي روح كانت حاضرة وبتطوف في بيت (فدوى)، لأن غالباً هي الست اللي ردت عليا بصوت هامس وقالت لي أنا إحسان... م الآخر لازم نعرف مين إحسان دي بالنسبة لـ (رشا)

- طب وإيش عرفك إن ليها علاقة بـ (رشا)؟

- لأن كل اللي بيحصلنا ده بدأ من يوم ما (فدوى) عرفت من صاحبته الحالة بتاعة (رشا)... ويوميها لو تفكر حكيت لنا حاجة شبه أعراض هيسثيريا الصورة... لما قالت واحدة بتشوف نفسها في الصور اللي حوالها كأنها مراية، فيمكن ده كمان عرض من أعراض هيسثيريا الصورة فعلاً

- تمام... يبقى كده حياة (رشا) الخاصة هي اللي بتقرض نفسها... وجاية لنا لحد عندنا من غير ما نخش فيها!!

∞ ∞ ∞ ∞ ∞

كثيراً ما يصبح الخوف دافعاً لأشياء إيجابية، ربما يفعل في الإنسان ما عجزت السنوات والحوادث أن تفعله..

وأكثر المتفائلين في العالم لا يمكن أن يصل لخياله أن (حمزة) الآن جالس على السفرة مع والديه ويتناول معهما وجبة الإفطار، بل ويسير ملاصقاً لأمه وهي تقوم

الأستاذ عادل يشير لزوجته بيده وملامح وجهه إشارة مفادها: إنسي... ابنك مش هيتغير عليه العوض

∞ ∞ ∞ ∞ ∞

في مستشفى الدكتور هاني تكدست سيارات الشرطة والصحفيون والموظفون والعاملون في المصحة أمام جنته المحطمة على الأرض، وسط دهشة الجميع من هذه النهاية غير المتوقعة لواحد من أنجح أطباء المخ والأعصاب في مصر، وصاحب أشهر مصحة نفسية لعلاج الإدمان والأمراض النفسية المستعصية.

وبينما كان ضابط الشرطة يحقق في الحادثة التي تشير كل الدلائل على أنها انتحار كالعادة، كانت إحدى الممرضات تهمس لزميلتها في خبث..

- ربنا ما بيسبيش... يالا أهو مات ما تجوزش عليه إلا الرحمة

- يا شيخة اتقي الله.. ده بقى في دنيا تانية... حسابه عند ربنا بقى

- ربنا يسامحه ع اللي عمله وكان بيعمله

- خلاص بقى.. افتكري له خير

- هو فين ده؟!... أنت بس اللي بنتسي... نسيتي طريقته مع كل واحدة مننا بعد ما تتعين، وتخش له مكتبه لوحدها... ده إحنا لولا قرابيه من البلد وخاف لنفضحه كان زمانه رمانا زي الكلاب بعد ما قاوحنا معاه وحجرنا

- ربنا يسامحه بقى... كان غاوي... رغم إنه دكتور يتحلف بشطارته.. سبحان الله

- ولا اللي عمله مع البت الشقرا اللي انتحرت... فاكرة... ده بيقولوا حاول يغتصبها لولاش لمت عليه المستشفى يومها

- ياسااا اتر يارب عليكى... إنت إيه؟!... ما عندكيش دين... كفاية بقى!!

كان هذا الهمس مؤشراً لما قيل بعد ذلك في التحقيقات لمعرفة ما إذا كان الدكتور هاني انتحر بإلقاء نفسه من نافذة مكتبه في تمام الساعة الرابعة فجراً، أم أن أحدهم ألقى به.

ولم تكن موظفة واحدة فقط هي التي شهدت بذلك، حيث كان من الواضح بل من الأكيد أن الدكتور هاني له صيت ذائع في التحرش بالممرضات والمرضى ممن يستجبن له.

ويبدو أن في هذه القائمة حسب رواية كثير من الشهود، (رشا الجداوي) التي لم تستجب لذلك وحاولت فضحه ولكن وقوعها تحت قهر وضعف مرضها جعلها تتراجع احتياجاً لدعم الدكتور هاني.

وفور أن وصل الخبر إلى مقهى الندوة الثقافية، كان الدهول والصدمة هما رد الفعل الغالب عليهم، وبالأخص الدكتور مريد الذى لام نفسه وشعر بالإحساس بالذنب قليلاً، لأنه لم يتجاوب مع استجداد الدكتور هاني به..

ولكن ماذا كان عساه أن يفعل لينقذه في توقيت حرج، وقد كان منهك القوى، مجهد الأعصاب كما برر له (نزار)؟!!

وبعيداً عن الأسباب والنتائج فقد قرر الفريق الرباعي، إنهاء ملف (رشا الجداوي) ليعودوا إلى حياتهم الطبيعية، قبل أن يستقل الأمر، فكانت الجلسة المطولة التي

وضع فيها (حمزة) و(مريد) و(نزار)، كل ما حدث نصب أعينهم بالورقة والقلم، ثم إصرارهم على استدعاء (فدوى) وخروجها من حالتها كي لا تتفاقم، بدايةً لنهاية حكاية (رشا الجداوي) وجدتها إحسان المانستيرلي).. أي منهما المعذب وأي منهما الذي يبحث عن حق دمائه التي لم تبرد، عبر مسارات (نون) الغاضبة؟!!

∞ ∞ ∞ ∞ ∞

لم يكن صوت (فدوى) وهي ترد على مكالمة (نزار) بأفضل حالاً من ذي قبل، ولكن ما قاله لها زميلها الصحفي في هذه المكالمة، شحن من بطاريتها ما يجعلها تقرر العودة مجدداً لساحة المعركة..

يكفي أنها أنهت المكالمة واتجهت على الفور لتبديل ملابسها وهي تردد عبارة "أنا فتاة مختلفة... أنا لست إنسانة عادية"... فهل هي قناعات حقيقية ينبغي أن يشعر بها من يتصدى لمثل تلك الظاهرة التي لا زالت كامنة؟... أم هي مجرد تبريرات وهمية يمنح كل منهم بها نفسه مقومات وأسباب الحياة..

تلك هي خطورة أن تعرف... ثم تحيا بعد أن تعرف؟!!

استعد الفريق لخوض غمار الجولة الأخيرة في لعبة الجنون والهلع التي أحاقت بهم، والتي جعلتهم يترحمون على أيام جريمة (شهيره) وعشيقها في حق زوجها (رامي)، حيث لازالت علامات الاستفهام مترابدة، والأرواح المحلقة كثيرة.

ولكن (حمزة) استطاع أن يحدد المسار النهائي للزفرة الأخيرة للعاصفة المنبعثة من البوابة نون، فكل الأسرار الآن تحتشد عند الشخص الوحيد الذي عاش مع (رشا) لحظاتها العصبية قبل انتحارها، ويعرف الكثير عنها وعن عائلتها بحكم الصداقة وبحكم الجوار.

إنها (داليا عمار) صديقة رشا والصديقة القديمة أيضاً لـ (فدوى)، والتي كانت جسراً عبرت به تلك الصرخة القادمة من عالم الحقيقة؟!

(داليا عمار).. فتاة من نفس عمر (فدوى) كانت جارتها منذ سنوات، وتعرفت على (رشا) خلال جيرتها لها في (كومباوند) تسكنه أرقى عائلات مصر، لم تكن تماماً مثل جارتها في كل طباعها، ولكن كانت لهما مغامرات وحكايات سهر وحفلات غير منضبطة أثارت حفيظة أسرتها وحذروها من رفقة (رشا)، بل طالبوها بقطيعتها، في وقت كانت (رشا) فيه تعيش بمفردها، وتفعل ما تشاء دون ضابط، ولا تعباً بمحاولات جدتها للتحكم فيها، بل وكانت كثيرة الشجار معها منذ أن كانت صغيرة... وزاد الأمر بعد وفاة والدتها المفاجئة والغامضة، ثم وفاة والدها الذي وهبها معظم ثروته، وكان يدللها ويترك لها العنان تفعل ما تشاء، ويشتبك في شجار مع أمه إذا لامته على ذلك.

جلس الأربعة في بيت (داليا) يستمعون لحديثها الطويل... والذي كشف العديد من الأسرار الغامضة والمثيرة بين جنبات وأركان قصر (الجدواوي)

لم تجد (داليا) أي غضاضة، أو صعوبة في إفشائها أسرار كامنة كان كتمانها سبباً في تعاستها وخوفها وإصابتها بالإكتئاب، وكأنها تحينت الفرصة لتروي وتخرج ما يؤرقها من حكايات سوداوية كانت قابعة في سراديب عفنة في القصر الملعون.

∞ ∞ ∞ ∞ ∞

كان الإحساس بالتطهر والبراء من الذنب الذى انتاب (داليا) وهي تحكي عن صديقتها، ملحوظاً في نبرات صوتها، وسكاتها وحماسها وهي تتحدث، مما يفسر أن العلاقة بينها وبين (رشا) في السنوات الأخيرة من عمرها، كانت لا تخلو من الابتزاز والتهديد بين بعضهما البعض، من خلال ما تعرفه كل واحدة عن الأخرى.

ولكن، ثمة شيء عظيم منع (داليا) من قبل أن تحكي عن سجل (رشا) الحافل بالخطيئة حتى لا يفتضح أمرها، لذلك فهي الآن تستطيع أن تحكي في أمان.. أو كما تظن هي ذلك.

- فدوى: معلش يا داليا لو كان الكلام هيضايقك... بس اح...-

- (قاطعها حمزة): والكلام هيضايقها ليه يا فدوى.. إحنا محتاجين نعرف كل حاجة يا داليا.. وكمان بخلاف أي تفاصيل عن حياة رشا.. عايزين نعرف مين هي (إحسان هانم المانستيرلي)... هي جدة رشا مش كده؟!!

- (داليا): أيوا... بس مش ممكن نعرف مين هي إحسان جدة رشا إلا لما نعرف طبيعة العلاقة بينهم كانت عاملة إزاي

أنا هاحكيلكم... إيه اللي وصل رشا لحالتها دي؟!... وراحت فين جدتها?!!

وقبل أن تبدأ (داليا) حديثها الذى يتشوق له الجلوس، دخلت عليهم الخادمة تحمل بعض العصائر للضيافة، فالتقت الجميع إليها وانتظروا تلك الثواني المعدودة التي تقدم فيها الخادمة العصير إليهم واحداً تلو الآخر ببطء بدا ملحوظاً مما أثار حفيظة (داليا) فخاطبتها بشيء من الحدة:

- بسرعة من فضلك يا أم سيد!!

- حاضر يا ستي.. طب (النسكافيه) بتاع حضرتك أهو

اقتربت الخادمة منها لتعطيها فنجان (النسكافيه) فلم تنظر لها (داليا) وعينها على الفنجان لتجد مكتوباً على وجه المشروب كلمة (هاقتك)، فحفظت عيناها، ورفعت نظرها للخادمة لتجدها (رشا) تبتسم لها في تحفز!!

ترتعد (داليا) وتقذف بالفنجان بعيداً، وهي تصرخ وتنهض من مكانها، وسط دهشة الجميع وقلقهم، فجميعهم أصبح متمرساً على هذه النوعية من السلوكيات وردود الأفعال ولكنهم مندهشين من عدم وجود ما يثير ذعرها بهذا الشكل?!!

- مالك يا ستي؟!... أنت كويسة؟!... معلش فداكي هاجيبلك غيره

- لاااا... شكراً مش عايزة حاجة... روعي يا أم سيد

آآآنا أسفة أوي يا جماعة... معلش الحقيقة أنا أعصابي بايظة بقالي فترة طويلة من قبل حتى ما (رشا) الله يرحمها تموت... و(فدوى) عارفة كده

(فدوى): حبيبتى اهدي بس... وروقي... وسيبك من المواضيع دي... ولو تعبانة نجيلك وقت تاني

- د. مريد: لاااا لاااا ده أكيد شوية إرهاب من قلة النوم، بس إنما ما توهميش نفسك، وتدخلني مخك في دوامات مالهاش آخر... إنت كويسة وزى الفل.. وإحنا مش عايزين نيجي تاني... عايزينك تنسي الموضوع... بس محتاجين نعرف طبيعة العلاقة بين رشا وبين جدتها إيه؟

فدوى تنظر للدكتور مرید باندھاش، وحمزة ونزار یسحبانها من یدھا لتجلس قسراً على الأریكة بجانبھا في حركة تحمل معنى: اسکتی.. إنا ما صدقنا لاقینا حد یتکلم

- (د. مرید): اتفضلي استريحي يا داليا... براحتك خالص... وإنا سامعينك

- (داليا): طب هو أنتو عايزين تعرفوا المعلومات دي علشان إيه؟!!

(حمزة) يتأفف.. و(نزار) يضع يده على رأسه ويقول في سره صامتاً: يا دين النبي على أم السؤال اللي مش هنخلص منه ده

- (د. مرید بحزم یقترب من الحدة): بحث... بنعمل بحث... إنا التلاتة دكاترة طب نفسي وواحدین (رشا) حالة، وجبنا معانا (فدوى) علشان صاحبك مش أكثر... أنت مش مفهماها يا فدوى؟!!

- (فدوى): آه آه... قتلها والله بس الحقيقة أنا عاذراها... ما تيجي نسيبها تستريح النهارده ونيجيلها بكره

- (حمزة) ده لو فضلت لبكره!!

- (داليا): أفندم؟!!!!

- (نزار): لأ یقصد إن إنا مش فاضيين بكره... ومش هنعرف نتجمع تاني... أستاذة داليا... بعد إذنك سؤال: هي والدة رشا ماتت إزاي وإمتی؟!!

بذكاء الصحفي وقدراته الخاصة على جذب الضيف للحوار، عرف (نزار) كيف یصطاد الفريسة ویسحب من (داليا) أولى خيوط الحكاية!!

∞ ∞ ∞ ∞ ∞

حظيت (رشا) بقسط وافر من الحياة المرفهة، وامتلكت بجانب ذلك نسبة ليست بقليلة من الجمال الفتان، فكانت دائماً مثار تنازع الفتیان عليها، واقتتالهم من أجل رضاها، تكلم وتميل لمن تريد، وتترك وتتنمى على من تريد..

هكذا فهمت واستيقنت (رشا) أنها تملك الدنيا بين يديها، خاصة أن أباه وأمه لا يعرفان معها كلمة (لا)، حتى أخوها لم یستطع أن یقترب من حرمها المقدس أو یمارس معها دور الأخ الأكبر، حيث كان يتعرض لمعاملة سيئة وغريبة من أبيه، وكثيراً ما تعرض لضرب مبرح حين حاول أن یمارس سلطته الطبيعية على أخته، خاصة حين بدأ یتنامى لمسامعه ما یصعب أن یتقبله رجل شرقي على امرأة تخصه.

فكان كثيراً ما یعيره أصدقائه بأخبار أخته، وحكاياتها التي لا تنتهي، إلى أن كان ذلك اليوم الذي رآها فيه، في إحدى الحفلات الساهرة داخل القصر وهي في ركن من أركانه وقد اختفت عن العيون، وكانت صدمته حين وجدها ثمة بين يدي شاب من أصدقائها یتبادلان القبلة الحارة.

فلم یتمالك أعصابه، وأمسك بهذا الشاب واعتدى عليه بالضرب المبرح حتى أفقده الوعي.. وكان ابن أحد أصدقاء والده المدعوبين من رجال الأعمال الكبار وزوجاتهم.

مما أثار غضب والده، وانهاه عليه بالضرب والإهانة البالغة خاصة أن (شريف) اختار أن یصمت ولا یحكي عما شاهدته حفاظاً على سمعته وسمعة والده والعائلة

كانت دموع (شريف) وآلامه النفسية في تلك اللحظة لا يراها ولا يشعر بها إلا شخص واحد في هذا الحفل.. إنها سيدة القصر الكبيرة (إحسان هانم)، التي رقت لحفيدها فاحتضنته وأخذته بعيداً عن الحضور مكثفية بالتمتمة:

- كده.. كده يا رشدي... تعمل في ابنك كده.. تموته قدام الناس

الأصعب من ذلك أن والده لم يكتف بذلك بل أصر على طرده بعد دقائق من نهاية الحفل وانصراف الحضور، وسط توسلات جدته، وبكائها

في هذه اللحظة كانت (داليا) أحد من يرون هذا المشهد من الدور العلوي أمام غرفة رشا، حين طلبت منها (رشا) المبيت معها خوفاً من ارتياب أمها أو جدتها مما حدث. وكان طرد (شريف) وضربه على مرأى ومسمع من الأم التي كانت صامتة كأنها لا ترى شيئاً... و(رشا) التي اعتلت شفيتها ابتساماً تتذكرها (داليا) جيداً من فرط استقزازها.. والجدة التي ظلت تتوسل لابنها ألا يطرد (شريف) خارج البيت.

ولم ينس شريف ولا جدته هذا الليلة التي اضطر فيها للمبيت عند أحد أصدقائه، مما جعل هذه الواقعة نقطة تحول كبيرة في علاقة (رشا) بجدتها.

كانت كل تعاملات شريف مع والده ترمي لفكرة بعيدة غير محتملة ولا واردة، ولكنها قابعة في اللاوعي من تراث أفلامنا العربية الكلاسيكية، وربما يكون فيلم (الخطايا) أحدها. لكن في أوقات أخرى نادرة كان (رشدي) يبدي حرصه على أن يكمل (شريف) دراسة الهندسة في الجامعة الأمريكية مثلاً، هكذا سمعت (داليا) منه ذات مرة من مرات زيارتها لصديقتها.

حرصت (رشا) على ألا تتكرر تلك الفضيحة مرة أخرى، فأصبحت تأخذ حذرهما.

وذات مرة وجدت جدتها في رسالة وصلتها من رقم مجهول صور من حوار بين حفيدتها وبين الشاب الذي ضربه (شريف)، و يضم هذا الحوار رسالة تهديد بالقتل من هذا الشاب الذي كان على علاقة بها لمدة طويلة، وفهمت من فحوى الرسالة أنها تركته وارتبطت بشاب غيره.. وأنها لا تبالي بتهديده

فعلى الفور توجهت لغرفة حفيدتها، وطرقت الباب بعنف.. فجاءها الرد أعنف

- ميبين؟!!!

- افتحي يا رشا أنا إحسان

- (من خلف الباب): خير يا (تيتة) عايزة حاجة؟!!

- افتحي يا بنت... أنت هتكلميني وأنا ع الباب ولا إيه؟!!

في عصبية قامت (رشا) وفتحت الباب موارباً وكأنها لا ترحب بدخول جدتها، فنظرت لها جدتها بحدة، وقبل أن تنهزها بادرتها (رشا)

- خير فيه حاجة... ويا ريت تتجزي بسرعة

رفعت جدتها الموبايل أمام ناظرها وقالت لها

- ممكن أفهم إيه ده؟!!

تغير وجه (رشا) وبدأت عليه علامات الخوف ثم ردت في نبرة اهدأ:

- إيه ده مش فاهمة؟!!

- باقولك إيه اوعي تتكري وتفكريني مش فاهمة في الحاجات دي... لااا.. أنا فاهمة
كويس أوى... تقدري تقولي الزفت ده بيقولك كده ليه؟!!

- مين اللي وصلك الحوار ده؟!!

- ما تجاوبيش بسؤال... وسعي كده من قدامي وخشي جوه بدل ما أمك ولا أبوكي
يسمع!!

دفعتها (إحسان) بقوة لتجد معها في الغرفة (داليا)، فلم تسلم عليها امتعاضاً من كل
ما يتعلق بحفيديتها، ولكنها لمست في عينيها لغة مفادها أنها هي من أرسل لها هذه
الرسالة... بدافع الخوف عليها من هذا الشاب الموتور.

- مين الواد ده؟!... وعاييز إيه?!!

- ده حاتم ابن "أنكل" وهدان

- ممم... مش حاتم ده اللي أخوكي ضربه قبل كده يوم الحفلة؟!... ويا ترى بقي
ضربه ليه?!!

بصي... تردي ما ترديش... أنا بقي مش هاسكتلك وإذا كان أبوكي وأمك مش
فاضيين يربوكي أنا بقي اللي هاربيكي يا سافلة

لم تمهل (رشا) جدتها كي تكمل إهاناتها، فنهرتها بشدة وبدأت في دفعها بقوة وبغلظة
خارج الغرفة وبأسلوب سوقي كانت تحدثها:

- إنت فاكرة نفسك هتخوفيني... اعلمي اللي تعمليه... لعلمك حاتم وغيره وغيره زى
الخاتم في صباعي... ووريني بقي مين هيصدق تخاريفك... يالا بقي من هنا يا حاجة

- أنت حقيرة وما اتربتيش

- طب يالا يا ماما من هنا... يالاااا... اطلعي بره... بر اااااااا

طردتها (رشا) ولكنها كانت تتصيب عرقاً خوفاً من افتضاح أمرها، لكن هذا لا
يُعيقها أبداً ولا يثنيها عن عزائمها في الشر وأفكارها الشيطانية، فما هي إلا ساعات
وكان (حاتم) بين يدي عدد من البلطجية من أصدقاء عشيقها الجديد، ولم يتركوه إلا
حطام في قارة طريق مظلم، وكبيرهم يلقي على مسامعه جملة:

- ستك رشا تبعد عنها... مفهوم... ستك رشا إيببييه?!!

فيركله في فمه الممتلئ بالدماء ليحبيب في هلع:

- أبعد عنها... أبعد عنها... هابعد عنها!!

توالت الحكايات وقصص العشاق، وبدأت عائلة (داليا) في الحذر من صديقة ابنتهم،
حتى صدرت الأوامر لها بالألا تخرج معها ولا ترافقها في الجامعة، مما أثار حفيظة
(رشا) وغيرها، ولعلها كما روت (داليا) غيرة نابعة من عقلها الباطن وفطرتها
السوية التي كانت تتمنى أن يكون لها أم وأب يغاران عليها ويحيطانها بهذه الرعاية.

فحاولت الاقتراب من (داليا) ولكن الأخيرة طلبت منها الابتعاد لفترة، فاستشاط
غضب (رشا) وبدأت في تهديدها بسقطة صغيرة ذات مرة حرصت على تسجيلها
صوت وصورة، حين أغوتها في إحدى الليالي، وسلطت عليها أحد الشباب لكي

يوقع بها، وفي لحظة خاطفة استسلمت فيها (داليا) كانت كاميرا (موبايل) رشا ناقلا
حيًا لما يحدث.

∞ ∞ ∞ ∞ ∞

هكذا وجدت (داليا) نفسها تروي كل شيء بلا خوف، وتسترسل في التفاصيل حتى
ما يخصها، الأمر الذي جعل الرباعي يجلس مشدوهاً كأنهم في قاعة عرض
سينمائي.

ووسط هذا الاسترسال نال (نزار) عدة نظرات غيظ وحنق من زملائه حين قاطعها
قائلًا:

- طب أبوها وأخوها وجدتها وعرفنا... أمال أمها دي بقى حكايتها إيه؟

وقبل أن يفترسه (حمزة) بالهجوم عليه، كانت إجابة (داليا) كفيلاً بإعادتهم لحو
التركيز والإثارة.. حين قالت:

- أمها بقى هي سر اللخبطة اللي حصلت في البيت ده كله!!... طنط (مديحة) فضلت
لغز كبير بينها وبين جوزها لحد يوم معين، عمري ما هنسى منظر (رشا) فيه لأنها
بجد صعبت عليا فيه، وعيظت لما كانت هتموت

كانت السيدة (إحسان) تخاف على سمعة العائلة، وتخشى يومًا ما تنتثر فيه أخبار
(رشا)، فلم تجد بدأً سوى كتمان ما تعرفه عن حفيدتها، فضلًا عن أنها حقا بدأت
تسعر بالخوف منها ومن ردود أفعالها العنيفة.

خاصة حين هددتها بقوة ذات مرة عادت فيها رشا مبكرًا ولكنها مخمورة حتى
التمالة، فتسللت لغرفتها سريعًا، ولحقتها جدتها التي شعرت بأنها ثملة، فنهرتها بشدة
وجذبتها من يدها، ولكنها فوجئت بعنف مفرط منها، حيث أمسكت (رشا) بتلابيبها
ودفعتها حتى جعلتها تلاصق الحائط وهي توجه لها كلمات تحذير:

- اسمعي يا ست انتي... آخر مرة باحذرك... لو ما طلعتيش من نافوذك... وربنا
هابهدلك... فاهمة... هابهدلك

صُغقت جدتها حقًا، وشعرت بأنها ليست أمام فتاة في منتصف العشرينيات، ولكنها
أمام غول شرس قادر على ابتلاع من أمامه!!

وفي يوم ما، كانت (داليا) عائدة مع صديقتها من جولة الركض الصباحية وبملايس
الرياضة، وفوجئًا بصراخ ما وشجار داخل البيت وبمجرد الدخول في بهو القصر،
وجدت السيدة إحسان تقف في منتصف السلم وتصرخ بأعلى صوتها وكأنها تريد أن
تسمع الخدم وكل الناس:

- يا خاينة يا سافلة يا حقيرة... وديني وما أعبد لأقول لرشدي لما يرجع م السفر...
يجي يشوف البيت اللي ضاع... طبعًا... من يوم ما كسر بقلب راجل البيت ونكس
رايته قصاد الناس... والبيت ما بقاش طبيعي

أنا هافضحك في كل حنة... أنا هاعرف الناس كلها إنك كنتي في حضن راجل...

وقعت هذه الكلمة كالصاعقة على قلب ومسامع (رشا) التي أبت أن تصدق ما تسمعه
وهي تنظر لأمها وهي بقميص النوم وتمسك بيد (إحسان) وتحاول إيقاف صراخها،
متوسلة إليها بأن تسكت.

يديها في الهواء، وتحاول إخراج رأسها لتتنفس، مستغلة أنهما مخمورين ولا عزم لهما في مقاومة رغبتها في الحياة، حتى أنها غرست أظافرها في رقبة رشا فجرحتها، مما أثار غضبها وأفاقها نسيباً

فما كان منها إلا أن أجهزت عليها حين خطرت على بالها فكرة قاسية لا تصدر إلا من قلب مجرم امتلاً مواتاً، حيث وقفت على جسدها بقدميها هي وصديقها لتضمن غرقها السريع، واقترب الثالث يقترب ليصور وجه العجوز وهو يغوص في الماء وعيناها الجاحظتان لا تغادران الكاميرا.

انتهى كل شيء...

(رشا) الآن وحدها تسكن أعلى القصر... وجدتها جثة تتوارى في حفرة عميقة داخل القبو أسفل القصر.

ورغم أن (الفيديو) كان مما أطلعت عليه (رشا) صديقتها (داليا) في لحظات ضعفها ومرضاها، حيث كانت فاقدة لطعم الحياة، وتلجأ للاعتراف علها تستريح، إلا أنها بعد مقتل جدتها كانت تظن أن الحياة ستضحك لها وأنها ستعيش مع ملذاتها، وراحت تردد لكل الجيران ومنهم (داليا) أن جدتها إحسان اختفت فجأة، ثم ادعت أنها أصيبت بمرض (ألزهايمر) قبل اختفائها الأمر الذي أقنع حفيدها (شريف) حين سأل عنها.

∞ ∞ ∞ ∞ ∞

هيسستيريا الصورة...

كان هو الخيار الأبعد... والمسار الأسود الذي اختارته لعنة (نون) لتطفئ به نار العجوز المعذبة في العالم الآخر.. وهل هناك أبشع من تلك فكرة؟!..

فالخوف في عالم الرعب يكمن دائماً في فكرة تحريك الثابت، وما تطمئن النفس ويؤمن العقل أنه ثابت لا يتحرك ولا يتغير..

أما وقد تغير وتحرك أيضاً.. فهنا لا يجد العقل سبيلاً إلا إلى الشتات..

هكذا صُنعت (هيسستيريا الصورة) وهي أقل ما تخرج به العجوز (إحسان المانيسيرلي) من حفرتها ومن قبوها، بعد أن ظلت لآخر ثانية في عمرها تحت فلاش الكاميرا وفي مرمى الصورة، فتزهق روحها تحت أقدام حفيدتها وعشيقتها داخل (البانيو).

انتظرت العجوز مرور ٧ أيام تمتلئ فيهم حفيدتها بالحياة والأمل، حتى خرجت العجوز في اليوم الثامن من قبوها القديم، وقررت أن تجهز عليها في ساعات معدودة ومع مطلع شمس اليوم بدأت مسارات نون تحيط بالقصر وتتغلغل داخله.

استيقظت (رشا) حسبما روت - منهارة وباكية - لصديقتها (داليا)، ودخلت حمامها، لتخرج منه مذعورة حين خيل إليها أنها سمعت صوت أنفاس متلاحقة منبعثة من (البانيو).. ولكنها لم تبال... وفسرت الصوت على أي محمل مقنع.

وفي طريقها لباب القصر مرت بالكوريدور الكبير الذي تنتشعب منه الغرف، فأوقفها ذلك الصوت الحاني الدافيء... صوت أمها حين كانت تغني لها وهي طفلة، فتراجع خطوتين للوراء حيث الصوت المنبعث من غرفة جدتها إحسان، ثم تفتح

الباب الموارب لتجد في وجهها صورة كبيرة في مدخل الغرفة ولكن صوت أمها يتلاشى، فتدخل الغرفة بحثًا عن إحدى الخادמות لعلها تنظف الغرفة وتغني..

فتجد نفسها منجذبة لصورة جدتها بشدة، وكأنها مسحورة، فتدقق في ملامحها وهي تبتسم في وقار، ثم فجأة تتغير تلك الملامح، وتختفي الابتسامة وتقطب حاجبيها وتحد نظرات عينيها... فتسقط (رشا) على الأرض هلعًا... وتزحف على ظهرها خارج الغرفة، ثم تركض في الكوريدور في اتجاه السلم.

فوقفت لحظة لتلتقط أنفاسها، وهي لا تعي أن خلفها صورة جماعية كبيرة جماعية للعائلة حين كانت عائلة، فتلتفت حين شعرت بأن خلفها شيء ما غريب وغير مطمئن.

والتفت لتجد صورة العائلة، فتدقق فيها لتختبر نفسها هل أصيبت بالجنون أم ماذا؟! فتنهد حين رأتها ثابتة، وفي ثانية واحدة، رأت جدتها (إحسان) في الصورة سواهم جميعًا، تتحرك وترمي بعصاها، وتنزل على الأرض داخل الصورة وتبدأ في الزحف في اتجاه الخروج منها!!

لم تجد (رشا) هنا قدمًا لتحملها فسقطت على ظهرها فزعًا، وتدحرجت على سلم القصر، وراحت تنادي الخدم بأعلى صوت ولكن أحدًا لم يسمع، فأعدت النظر للصورة من بعيد لتجدها ثابتة.

ففتجه فورًا إلى الخارج نحو سيارتها، وتنتقل بها بعيدًا عن المكان، وهي تبكي بصوت عال.. ثم التقطت أنفاسها قليلًا وبدأت تفكر أين تذهب؟!... فعادت أمام القصر نحو بيت صديقتها (داليا) التي لم ترها منذ ٣ أسابيع، وشعرت وقتها أنها طوق النجاة، وبمجرد أن رأت صديقتها أصيبت بالإغماء فنقلتها (داليا) مستعينة بصديقة ثالثة إلى مصحة الدكتور هاني الزيات أقرب مستشفى لهم. وبقيت فيها ٣ شهور، كلما تعرضت لصورة ثابتة تحركت أمامها وخرجت منها جدتها (إحسان)، حتى قررت الخروج واضطرت لادعاء الشفاء، بعد أن تحرش بها الدكتور هاني، ولم تستجب له فورًا وتقززًا من حياتها القديمة، التي شعرت أنها من جلب لها اللعنات.

قررت (رشا) الخروج بعد أن علمت برغبة أخيها في العودة لمصر، واستغلال مرضها لينقض على ثروتها..

ولكنها لم تعلم أن مزيدًا من اللعنات ستجنيها بعد خروجها، فحينما كانت تفلت من هجمات جدتها كل مساء في غرف القصر وأركانها، كانت تقع تحت تهديد صديقتها بالقتل الذين طارداها وشعرا بغدرا ونكثها بالوعد.

فكانت رشا تنتظر الموت كل ليلة... إلى أن قررت أن تلتحق بوالديها اللذين سبقاها وحجزا غرفًا تليق بهما في الجحيم

∞ ∞ ∞ ∞ ∞

كان وصف (داليا) وقعه كاللهيب على نفوس (حمزة) و(نزار) و(فدوى) الذين كان من نصيبهم التشرف برؤية العجوز (إحسان) في كل حالاتها، فحدثت (نزار) في الهاتف، وظهرت كصورة لـ (فدوى)، ثم اختارت الثقيلة لـ (حمزة)، حين جاءت في آخر صور حياتها وهي تنازع الغرق تحت أقدام حفيدتها وعشيقها.

لذلك قام الأربعة بعد هذه الليلة، في حالة تجمد ذهني وفكري، وكانهم مخدرون لاهم خائفون ولاهم مطمئنون.

ولكنهم أصبحوا جميعاً على قناعة تامة بأنهم، قد وقعوا فريسة لا نهائية لمسارات نون وطاقتها السوداء، ولا مفر من ذلك.. فهم الآن سيحصلون على هدنة لا يعلم مدتها إلا الله، بعد أن ارتاحت روح (العجوز) المغدورة، وعادت لمستقرها، فور أن قام الأربعة بتسليم الفيديو للشرطة لتلقي القبض على قاتليها الشابين الذين كانا من الطلقاء. وقد علم (نزار) فيما بعد أن الشابين أصيبا بحالة نفسية وخلل عقلي خلال محاكمتهم، مما جعلهما يقعان كلعبة في يد (إحسان) تتلذذ بالانتقام منهما كيفما شاءت، فتجبر أحدهما على سكب الغاز على جسده وحرق نفسه، وتسوق الثاني إلى الركض عارياً في شوارع القاهرة نهاراً والنوم في أكوام قمامتها ليلاً.

توقفت (داليا) عن الحكي.. وودعت ضيوفها وهي من داخلها تقول لهم: لا تتركوني وحدي.. ربما لأنها على قناعة تامة أن الليل لا زال طويلاً وأن ثمة زائر تنتظره وتعرفه جيداً يترقبها، وسيقضى معها بقية السهرة..

وما هي إلا أيام وكانت (داليا) نزيلة لدى مستشفى الدكتور مريد الذي أدرك بعد انتحارها أن حالتها ميئوس منها، فصديقتها قررت ألا تنفصل عنها، وسافقتها في مسارات جبرية حتى رأت أن قطع شرايينها هو أقصر طريق من خلاله يلتقيان.

∞ ∞ ∞ ∞ ∞

تنتهي المعاناة... وتتعاقب أيام هادئة، لا خوف فيها ولا ترقب..

وتسطع شمس دافئة على غرف آمنة، تنسى معها النفوس عذاب الماضي.. وكأنها لم تذق مرارة من قبل..

الثلاثة (مريد) و(حمزة) و(نزار) في أبهى صورة يرتدون بدل سوداء، ويركبون سيارة (مريد) الفارحة في طريقهم لقاعة الاحتفال بخطوبة (فدوى)...

فلينعم الجميع بالهدنة... فما الحياة إلا لحظات بين اللذة والألم..

∞ ∞ ∞ ∞ ∞

متميزون للكتب النصية



لينك الانضمام الى الجروب - Group Link

لينك القتاة - Link